

Abdiyu Maxaafa Gaatha Qofa

Ha Abdiyu maxaafay, hayqo abbaafe dugeha baggan de7iya Edoomme bolla gakana pirda odees. Edoomme asay, Yisaaqa nayta, Eesawu sheeshata. Entika Yayqooba isha Eesawu banta mayzan cee-qitiya gisho Isra7eele dabbota. Ha qantha maxaafay Yerusalaamey K.Y.S. 586 laythan laaleti-daape guye de7iya woden xaafetis.

Abdiyu maxaafay nam7u kifiletan shaaketees.

1. Paydo 1-14 gakanaw de7iya kifiley, Edoomme asay banta otero nagara gishonne Yihuda kundethaninne Yerusalaame laaletethan ufaytida gisho pirdetanaw de7eysa entaw odees.

2. Paydo 15-21 gakanaw de7iya kifiley, Edoommey Isra7eele morketara issife xoonetanaysanne iita pirda ekanaw de7eysa odees.

Maxaafa Ayfe Qofata

Edoomme otoruwanne pirdetetha (1-9)

Edoomme wozana minotethi (10-14)

Isra7eeley xoonana (15-21)

Edoomme Otoruwanne Pirdetetha

¹ Abdiyuy be7ida qoncethaa. Godaa Xoossay Edoommeba haysada yaagees:

Edoommeba Goday, ba kiittiya addiya bolla kawotethatas kiittidaysa nuuni si7ida; “Dendite! Edoomme olanaw boos” yaagis.

² “Heko, ta nena kawotethata gidдон laafa kessana; neeni daro kadhethidaysa gidana.

³ Neno, zaalla qopho gidдон de7eyso, ne keethaa dhoqa dereta bolla keexidayso, ne wozanan, ‘Tana haysafe sa7an wodhisana yoonnee?’ yaageyso, nena ne wozanaa otoroy cimmiis.

⁴ Ne arganthada pude haakada piradhikoka, ne keethaa xoolintota gidдон keexikoka, ta nena yaape duge wodhisana” yaagees Xoossay.

⁵ “Kaysoy woyko banqiya asi qamma yiiko, bantaw gideysa mela xalaala kaysotokonayee? Woyne maxeysati maxishe, poshile ashshokon-aayee? Shin ne morketi nena polo dhaysana.

⁶ Abeeti Eesawey waanidi bonqetandee? Qosan de7iya iya shaloy waanidi eketandee?

⁷ Neera caaqidayasati ubbay nena ne biittafe gooddana; qassi ne ammanetida laggeti cimmiidi nena xoonana. Ne kathaa midaysati ne ogen gite yeggana, shin neeni hessa akeekaka” yaagees.

⁸ “He gallas taani Edoomepe cincatanne Eesawe zumaape akeeka dhaysana.

⁹ Hinteno, Temaana asato, hinte olanchoti dagammama; Eesawe zuma bolla de7iya asa ubbay goyretana” yaagees Goday.

Edoome Wozana Minotethi

¹⁰ Ne ishaa Yayqooba bolla ne oothida iitabaa gisho, ne yeella ma77ana; ne merinaw dhayana.

¹¹ Imathatinne allagati iya shaluwa bonqiya gal-las neeni gaxa keyada eqa xeelladasa. Qassi iya pengera gelidi, Yerusalaame katamaa bolla saama yeggiya wode neeni entafe issuwa mela gidadasa.

¹² Neeni ne ishay metootiya gallas iya metuwan ufaytanaw bessennashin; Yihuda asaa bolla waayey gakiya gallas hashshu gaanaw bessennashin. Enta un7a gallasan otoron odetanaw bessennashin!

¹³ Neeni enta metuwa gallas ta asay de7iya kata-maa gelanaw, enta waayan neeni ufaytanawunne enta metuwa gallas enta shaluwa bonqanaw bessennashin!

¹⁴ Baqateyisata wodhanaw neeni daggala ogen naaganawunne attidaysata enta un7aa gallas morketas aathada immanaw bessennashin!

Isra7eeley Xoonana

¹⁵ Godaa pirda gallasay kawotethata ubbaa bolla matis. Neno Edoome, neeni harata bolla oothidabay ne bolla oosetana; ne oosoy ne bolla simmana.

¹⁶ Ta geeshsha zumaa bolla ne uyidaysa mela kawotetha ubbay qanxonna uyana; gujidika uyana; enti kase hani eronnabaa hanana.

¹⁷ “Shin Xiyoone zuman kessi ekidaysati daana; Xiyooney geeshshi gidana; Yayqooba kochay banta biitta zaari laattana.

¹⁸ Yayqooba kochay tama gidana; Yoosefa kochay laco gidana; Eesawe kochay buure gidana. Tami buure meysada, Yayqooba zerethaynne Yoosefa kochay Eesawe kochaa midi polo dhaysana” yaagees Goday.

¹⁹ Negebe mela biittan de7iya asay Eesawe zuma laattana; gadha biittan de7iya asay Filisx-eeme biitta, Efreema biittanne Samaare biitta laattana. Qassi Biniyaame kochay Galada biitta laattana.

²⁰ Di7etethafe simmida Isra7eele asay, Kanaaneepe bidi Sirafta gakanaw de7iya biitta laattana. Yerusalaamepe de7etidi, Safarada geetetiya bessan de7iya asati Negebe katamata laattana.

²¹ Ashsheysati Eesawe asaa haaranaw Xiyoone zuma bolla keyana; kawotethay Godaaba gidana.

Geeshsha Maxaafa

Gofa: Geeshsha Maxaafa (Bible) for Ethiopia, Latin script

copyright © 2024 The Word for the World International

Language: Goofa (Gofa)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

cd247997-ca42-596b-9d91-94ffba4675ef